



TUSAGASSIORTUNUT NAJOQQUTASSIAQ

PISORTAT INGERLATSINERAT PILLUGU PAASITINNEQARSINNAATITAANEQ

Attaveqarfissaq

Inatsisartut sulinerat pillugu paasissutissanik assigisaannilluunniit tusagassiortut siammarterinerannut iluaqutaasinnaasunik pissarsiniartoqartillugu tusagassiorfiit sukkulluunniit saaffiginnittarsinnaanissaat Allattoqarfimmiit kissaatigineqarpoq.

Saaffiginninnginnermili Inatsisartut nittartagaata ina.gl-ip alakkarneqartarnissaa siunnersuutigineqarpoq, tassanimi paasissutissat atortussallu attuumassutillit tamarmik tamanit takuneqarsinnaasumik saqqummiunneqartarmata.

Inatsisartuni sulianik paasitinneqarsinnaatitaaneq

Inatsisartut taakkulu allattoqarfiat Inatsisartut Ombudsmandiattulli pisortat ingerlatsinerat

pillugu paasitinneqarsinnaatitaaneq pillugu Inatsisartut inatsisaannut ilaatinneqangillat.

Tamatumunnga pissutaavoq Inatsisartut taaguummumut "pisortat ingerlatsinerannut" ilaatinneqangimmata. Pisortat ingerlatsinerat allaffissornikkulluunniit aqutsinerat suliaasaqarfittut ingerlatsivittulluunniit inatsisiliornerit tunngavigalugit innuttaasunik sullissiviusutut innuttaasullu ulluinnarni inuunerannut sunniuteqarsinnaasunik aalajangiiviusartutut paasineqassaaq, Inatsisartullu sulinerat sullinneqarnerallu tassunga ilaasutut oqaatigineqarsinnaanngilaq.

Tamatumunnga pissutaavoq Inatsisartut pisortat ingerlatsinerannik nakkutilliinermik taaneqartartoq taamaallaat ingerlattussaammassuk, taamalu nammineq inatsisiliornermik allaffissornikkut aqutaqaratik.





Inatsisit naapertorlugit ataatsimiititaliat pilersinneqartussat ataatsimiititaliallu ataavartut Inatsisartunit pilersinneqartut, Inatsisartut Siulittaasoqarfiat ilanngullugu, akuttunngitsumik ilanngussat atortussallu allat ataatsimiititaliamut siulittaasoqarfimmulluunniit ingerlatinneqarsimasut pillugit paasitinneqarnissamik kissaateqartunit noqqaavigneqartarput. Paasissutissat tamakku akuttunngitsumik isertuussassaasarput imaluunniit suliamut aalajangersimasumut tunngatillugu allakkiaasarlutik tamanut saqqummiunneqaralarunik siunertaaruttussat.

Tamanna pissutigerpiarlugu siulittaasoqarfimmi ataatsimiititalianiluunniit ataatsimiinnernit avammut tamanut ammasumik issuaasoqaqqusaanngilaq. Malittarisassaq tamanna aamma Inatsisartut ataatsimiittarfianni, tusagassiorfinnut allatulluunniit atuuppoq, soorlu aamma imaqarniliat, ilanngussatut atortussat il.il. tamanut saqqummiunneqqaqqusaaneq ajortut. Taamaattorli siulittaasoqarfiup ataatsimiititalialluunniit aalajangersinnaavaat siumut aalajangersarneqareersumik tamanut nalunaaruteqartoqartarsinnaassasoq.

Uunga e-mailimut saaffiginnittoqarsinnaavoq:

arnja@ina.alla.gl

uunga assilinera ilanngullugu:

inatsisartut@inatsisartut.gl

